


Corto circuito a causa candela feros na La Linda



ORANJESTAD—Desdesiman pasa cu a domina e candela feros cu a destrui diferente negoshi den caya grandi, por a mira agentenan di compania di aseguro ta inspecciona e edificio di La Linda pa determina kico realmente por a causa e candela. For di e dia di e candela, miembronan di Bombero a descarta tur posibilidad cu e candela a origina den un otro negoshi cu ta La Linda. E oficialnan di Bombero a mostra cu e candela a cuminsa na e parti patras den e parti ariba di e edificio di La Linda.

CORTO CIRCUITO

Bon Dia Aruba por a compronde cu e agentenan di aseguro ta practicamente cla cu nan investigacion pero tur cos ta mostra cu e candela a wordo

ocasiona door di un corto circuito. For di Polis tambe e informacion a wordo duna cu e causa di e candela ta un corto circuito. Durante un conferencia di prensa siman pasa, por a scucha Bombero expresa cu La Linda ta un negoshi hopi bieu y hopi biaha Bombero tabata preocupa pa cu seguridad pa candela den e negoshi aki. Te ainda no tin un cifra exacto di cuanto e daño causa door di e candela ta. Ta ser papia di miyones pero te ainda no tin nada concreto. Ta hustamente pesei, e agentenan di aseguro ta inspecciona e edificio pa finalmente dicidi si ta trata di un incendio intencional of no. Tin indicacion cu no ta trata di un incendio intencional pero tanten cu e compania di aseguro no duna un relato oficial, no por



bisa nada cu exactitud. Ora cu e relato aki ta cla, e compania di aseguro lo mester cubri e

daño.

Ta di spera cu pronto e investigacion keda cla pa asina

haci e ruina cu a keda atras limpi pa trece ambiente atrobe den caya grandi.

BON DIA ARUBA. - (DIAHUEBS 5 OKTOBER 2004)

EMPLEADONAN

Bon Dia Aruba por a compronde cu e empleadonan di La Linda no a keda desampara. Gerencia di La Linda a percura cu e empleadonan a wordo incorpora den e otro negoshinan di La Linda, mientras cu gerencia ta buscando un edificio pa huur pa bolbe reestablece La Linda. Ta ser papia cu e edificio di ex Interbank den caya grandi lo ta un di e posibilidadnan, mientras cu ta ser menciona diferente otro edificio.

Ohala cu gerencia lo por haya e edificio cu nan ta haya agradabel pa asina Aruba bolbe tin su tienda di pueblo esta La Linda.